

四庫全書

集部

欽定四庫全書

集部

元氏長慶集卷二十一至
三

詳校官監察御史_臣查瑩

檢討_臣何思鈞覆勘

總校官知縣_臣繆琪

校對官中書_臣雷純

謄錄監生_臣莫與儔

欽定四庫全書

元氏長慶集卷二十一

唐 元稹 撰

律詩

酬樂天春寄微之

鸚心明黠雀幽蒙何事相將盡入籠
君避海鯨驚浪裏
我隨巴蟒瘴烟中
千山塞路音書絕
兩地知春曆日同
一樹梅花數升酒
醉尋江岸哭東風

酬樂天舟泊夜讀微之詩

知君暗泊西江岸，讀我閒詩欲到明。
今夜通州還不睡，滿山風雨杜鵑聲。

酬樂天武關南見微之題山石榴花詩

比因酬贈為花時，不為君行不復知。
又更幾年還共到，滿牆塵土兩篇詩。

酬樂天見寄

三千里外巴蛇穴，四十年來司馬官。
瘴色滿身治不盡，

瘡痕刮骨洗應難
常甘人向衰容薄
獨訝君將舊眼看
前日詩中高蓋字

白詩云舉目爭能不惆悵
高車大馬滿長安

至今唇舌遍

長安

酬樂天得稭所寄紵絲布白輕庸製成衣服以
詩報之

湓城萬里隔巴庸
紵薄綈輕共一封
腰帶定知今瘦小
衣衫難作遠裁縫
唯愁書到炎涼變
忽見詩來意緒濃
春草綠茸雲色白
想君騎馬好儀容

和樂天尋郭道士不遇

道士昔常為僧
於荊州相別

昔年我見杯中渡今日人言鶴上逢
兩虎定隨千歲鹿

雙林添作幾株松方瞳應是新燒藥
短脚知緣舊施春

為僧時先
有脚疾

欲請僧繇遠相畫苦愁頻變本形容

酬樂天寄生衣

秋茅處處流痰

音皆
瘡也

瘡夜鳥聲聲哭瘴雲羸骨不勝纖

細物欲將文服却還君

酬樂天得微之詩知通州事因成四首

茅簷屋舍竹籬州虎怕偏蹄蛇兩頭

通州元和二年偏蹄虎害人比之白

額兩頭蛇處處皆有之也

暗蠱有時迷酒影浮塵向日似波流沙含

水弩多傷骨田仰畬刀少用牛知得共君相見否近來
魂夢轉悠悠

平地才應一頃餘閣欄都大似巢居

巴人多在山坡架木為居自號閣欄

也頭入衙官吏聲疑鳥下峽舟船腹似魚市井無錢論尺

丈田疇付火罷耘鋤此中愁殺須甘分惟惜平生舊著

書

本句云努力安心過三考已曾愁殺李尚書又予病甚將平生所為文自題云異日送白二十二郎也

哭鳥晝飛人見少，
倏魂夜嘯虎行多。
滿身沙虱無防處，
獨脚山魃不柰何。
甘受鬼神侵骨髓，
常憂岐路處風波。
南歌未有東西分，
敢唱滄浪一字歌。
本句云時時三唱濯纓歌
荒蕪滿院不能鋤，
甑有塵埃圃乏蔬。
定覺身將囚一種，
未知生共死何如。
饑搖困尾喪家狗，
熱暴枯鱗失水魚。
苦境萬般君莫問，
自憐方寸本來虛。

酬樂天聞李尚書拜相以詩見賀

初因彈劾死東川，
又為親情弄化權。

予為監察御史劾奏故東川節度使

嚴礪籍沒衣冠等八十餘家由是操權者大怒分
司東臺日又劾奏宰相親因緣遂貶江陵士曹耳
共經三峽水一時重上兩漫天尚書入用雖旬月司馬
銜冤已十年若待更遭秋瘴後便愁平地有重泉

酬樂天歎窮愁見寄

病煎愁緒轉紛紛百里何由說向君老去心情隨日減
遠來書信隔年聞三冬有電連春雨九月無霜盡火雲
併與巴南終歲熱四時誰道各平分

酬樂天三月三日見寄

常年此日花前醉今日花前病裏銷獨倚破簾閒悵望
可憐虛度好春朝

酬樂天歎損傷見寄

前途何在轉茫茫漸老那能不自傷病為怕風多睡月
起因花一作行藥暫扶牀函關氣索迷真侶峽水波翻礙
故鄉唯有秋來兩行淚對君新贈遠詩章

瘴塞

瘴塞巴山哭鳥悲紅粧少婦斂啼眉殷勤奉藥來相勸

云是前年欲病時

紅荊

庭中栽得紅荊樹十月花開不待春
直到孩提盡驚怪
一家同是北來人

黃草峽聽柔之琴二首

柔之公繼室
裴夫人也

胡笳夜奏塞聲寒是我鄉音聽漸難
料得小來辛苦學
又應知向峽中彈

別鶴淒清覺露寒離聲漸咽命維難
憐君伴我涪州宿

猶有心情徹夜彈

書劍

渝工劍刃皆歐冶
巴吏書蹤盡子雲
唯我心知有來處
泊船黃草夜思君

內狀詩寄楊白二員外

時知制誥

天門暗闕玉琤

音鈞呼宏切
撐聲相雜

畫送中樞曉禁清彤管內

人書細膩金奩御印篆分明
衝街不避將軍令
跋勅魚題宰相名
南省郎官誰待詔
與君將向世間行

別毅郎

此後工部侍郎時詩

爾爺只為一杯酒此別那知死與生兒有何辜才七歲亦教兒作瘴江行

愛惜爾爺唯有我我今顛顛望何人傷心自比籠中鶴翦盡翅翎愁到身

自責

犀帶金魚束紫袍不能將命報分毫他時得見牛常侍爲爾君前捧佩刀

送公度之福建

此後並同州
刺史時作

棠陰猶在建溪磯
此去那論是與非
若見白頭須盡敬
恐曾江岸識胡威

喜五兄自泗州至

眼中三十年來淚
一望南雲一度垂
慚愧臨淮李常侍
遠教形影暫相隨

杏花

常年出入右銀臺
每怪春光例早回
慚愧杏園行在景

同州園裏也先開

第三歲日詠春風憑楊員外寄長安柳

三日春風已有情
拂人頭面稍憐輕
殷勤為報長安柳
莫惜枝條動軟聲

贈別楊員外巨源

憶昔西河縣下時
青山顚顚宦名卑
揄揚陶令緣求酒
結託蕭娘只在詩
朱紫衣裳浮世重
蒼黃歲序長年悲
白頭後會知何日
一盞煩君不用辭

寄樂天二首

榮辱升沈影與身世情誰是舊雷陳
唯應鮑叔猶憐我自保曾參不殺人
山入白樓沙苑暮潮生滄海野塘春
老逢佳景唯惆悵兩地各傷何限神

論才賦命不相干鳳有文章雉有冠
羸骨欲銷猶被刻瘡痕未沒又遭彈
劔頭已折藏須蓋丁字雖剛屈莫難
休學州前羅剎石一生身敵海波瀾

聽妻彈別鶴操

別鶴聲聲怨夜絃聞君此奏欲潛然商瞿五十知無子
便付琴書與仲宣

和王侍郎酬廣宣上人觀放榜後相賀

渥洼徒自有權奇伯樂書名世始知競走墻前希得儔
高縣日下表無私都中紙貴流傳後海外金填姓字時

珍重劉繇因首薦

進士李景述以
同判解頭及第

為君送和碧雲詩

欽定四庫全書

元氏長慶集
卷二十一

八

元氏長慶集卷二十一

欽定四庫全書

元氏長慶集卷二十二

唐 元稹 撰

律詩

酬樂天喜隣郡

此後並越州酬和
並各次用本韻

蹇驢瘦馬塵中伴
紫綬朱衣夢裏身
符竹偶因成對岸
文章虛被配為隣
湖翻白浪常看雪
火照紅妝不待春
老大那能更爭競
任君投募醉鄉人

再酬復言和前篇

經過二郡逢賢牧聚集諸郎宴老身清夜漫勞紅燭會
白頭非是翠娥隣曾攜酒伴無端宿自入朝行便別春
潦倒微之從不占未知公議道何人

贈樂天

莫言隣境易經過彼此分符欲柰何垂老相逢漸難別
白頭期限各無多

重贈

樂人商玲瓏能
歌歌予數十詩

休遣玲瓏唱我詩我詩多是別君詞明朝又向江頭別
月落潮平是去時

別後西陵晚眺

晚日未拋詩筆硯夕陽空望郡樓臺與君後會知何日
不似潮頭暮却迴

以州宅夸於樂天

州城迴遶拂雲堆鏡水稽山滿眼來四面常時對屏障
一家終日在樓臺星河似向簷前落鼓角驚從地底迴

我是玉皇香桉吏謫居猶得住蓬萊

重夸州宅旦暮景色兼酬前篇末句

仙都難畫亦難書暫合登臨不合居
繞郭烟嵐新雨後滿山樓閣上燈初
人聲曉動千門闕湖色宵涵萬象虛
為問西州羅剎岸濤頭衝突近何如

酬樂天吟張員外詩見寄因思上京每與樂天
於居敬兄升平里詠張新詩

樂天書內重封到居敬堂前共讀時
四友一為泉路客

三人兩詠浙江詩別無遠近皆難見老減心情自各知
杯酒與它年少隔不相酬贈欲何之

寄樂天

閒夜思君坐到明追尋往事倍傷情同登科後心相合
初得官時髭未生二十年來諳世路三千里外老江城
猶應更有前途在知向人間何處行

戲贈樂天復言

此後三篇同韻

樂事難逢歲易徂白頭光景莫令孤弄濤船更曾觀否

望市

望市樓蘇之勝地也

樓還有會無眼力少將尋案牘心情且

強擲臬盧孫園虎寺隨宜看不必遙遙羨鏡湖

重酬樂天

紅塵擾擾日西徂我興雲心兩共孤暫出已遭千騎擁
故交求見一人無百篇書判從饒白八米詩章未伏盧
最笑近來黃叔度自投名刺占陂湖

再酬復言

繞郭笙歌夜景徂稽山迴帶月輪孤休文欲詠心應破

道子雖來畫得無顧我小才同培塿知君險鬪敵都盧
不然豈有姑蘇郡擬著陂塘比鏡湖

郡務稍簡因得整比舊詩并連綴焚削封章繁
委篋笥僅逾百軸偶成自歎因寄樂天

近來章奏小年詩一種成空盡可悲書得眼昏朱似碧
用來心破髮如絲催身易老緣多事報主深恩在幾時
天遣兩家無嗣子欲將文集與它誰

酬樂天餘思不盡加為六韻之作

律呂同聲我爾身文章君是一伶倫衆推賈誼為才子

帝喜相如作侍臣

樂天先有秦中吟及百節判皆為書肆市賈題其卷云白才子文章又樂

天知制誥詞云覽其詞賦喜與相如並處一時

次韻千言曾報答

樂天曾寄予千字律詩數

首予皆次用本韻酬和後來遂以成風耳

直詞三道共經綸元詩駁雜真難

辨

後輩好偽作予詩傳流諸處自到會稽已有人寫宮詞百篇及雜詩兩卷皆云是予所撰及手勘驗無一

篇是

白樸流傳用轉新

樂天於翰林中書取書詔批答詞等撰為程式禁中號曰白樸

每有新入學士求訪寶重過於六典也

蔡女圖書雖在口

蔡琰口誦家書四百餘篇于

公門戶豈生塵

樂天常贈予詩云其心如肺石動必達窮民東川八十家冤憤一言申因感無

兒之歎故予
自有此句

商瞿未老猶希冀莫把贏金便付人

寄樂天

莫嗟虛老海壖西天下風光數會稽
靈汜橋前百里鏡石帆山嶼五雲溪
冰銷田地蘆錐短春入枝條柳眼低
安得故人生羽翼飛來相伴醉如泥

酬樂天雪中見寄

知君夜聽風蕭索曉望林亭雪半糊
撼落不教封柳眼掃來偏盡附梅株
敲扶密竹枝猶亞煦煖寒禽氣漸蘇

坐覺湖聲迷遠浪回驚雲路在常途錢塘湖上蘋先合
梳洗樓前粉暗鋪石立玉童披鶴氅臺施瑤席換龍鬚
滿空飛舞應為瑞寡和高歌只自娛莫遣擁簾傷思婦
且將盈尺慰農夫稱觴彼此情何異對景東西事有殊
鏡水遶山山盡白琉璃雲母世間無

和樂天早春見寄

雨香雲澹覺微和誰送春聲入棹歌
萱近北堂穿土早柳偏東面受風多
湖添水劑消殘雪江送潮頭湧漫波

同受新年不同賞無由縮地欲如何

酬復言長慶四年元日郡齋感懷見寄

臘盡殘銷春又歸逢新別故欲沾衣自驚身上添年紀
休繫心中小是非富貴祝來何所遂聰明鞭得轉無機
祝富貴鞭聰明皆
正旦童稚俗法羞看稚子先拈酒悵望平生舊採薇

去日漸加餘日少賀人雖鬧故人稀椒花麗句聞重檢
艾髮衰容惜寸輝苦思正旦酬白雪閒觀風色動青旂
千官仗下爐烟裏東海西頭意獨違

思音四
旦音丹

代郡齋神答樂天

虛白堂神傳好語二年長伴獨吟時
夜憐星月多離燭日滉波濤一下帷
為報何人償酒債引看牆上使君詩

酬樂天重寄別

却報君侯聽苦辭
老頭拋我欲何之
武牢關外雖分手
不似如今衰白時

和樂天重題別東樓

山容水態使君知
樓上從容萬狀移
日映文章霞細麗

風驅鱗甲浪參差，鼓催潮戶凌晨擊。笛賽婆官徹夜吹，
喚客潛揮遠紅袖。賣壚高掛小青旗，以證切鋪床席春
眠處。高捲簾帷，月上時光景無因，將得去為郎抄在和
郎詩。

餘杭周從事以十章見寄，詞調清婉，難於遍酬。
聊和詩首篇以答來貺。

擾擾紛紛旦暮間，經營閒事不曾閒。多緣老病推辭酒，
少有功夫久羨山。清夜笙歌喧四郭，黃昏鐘漏下重關。

何由得似周從事醉入人家醒始還

寄浙西李大夫四首

柳眼梅心漸欲春
白頭西望憶何人
金陵太守曾相伴
共蹋銀臺一路塵

藥珠深處少人知
網索西臨太液池
浴殿曉聞天語後
步廊騎馬笑相隨

禁林同直話交情
無夜無曾不到明
最憶西樓人靜後

玉晨鐘磬兩三聲

玉晨觀在紫宸殿後面也

由來鵬化便圖南
浙右雖雄我未甘
早渡西江好歸去
莫拋舟楫滯春潭

初除浙東妻有阻色因以四韻曉之

嫁時五月歸巴地
今日雙旌上越州
興慶首行平聲千命

婦予在中書日妻以郡君朝
太后於興慶宮猥為班首會稽旁帶六諸侯
海樓翡翠間相逐

鏡水鴛鴦煖共游
我有主恩羞未報
君於此

外更何求

為樂天自勘詩集因思頃年城南醉歸馬上遞

唱艷曲十餘里不絕長慶初俱以制誥侍宿南
郊齋宮夜後偶吟數十篇兩掖諸公泊翰林學
士三十餘人驚起就聽逮至卒吏莫不衆觀羣
公直至侍從行禮之時不復聚寐予與樂天吟
哦竟亦不絕因書於樂天卷後越中冬夜風雨
不覺將曉諸門互啟關鎖卽事成篇

春野醉吟十里程齋宮潛詠萬人驚今宵不寐到明讀
風雨曉聞開鎖聲

題長慶四年厯日尾

殘厯半張餘十四灰心雪鬢兩悽然
定知新歲御樓後從此不名長慶年

元氏長慶集卷二十二

欽定四庫全書

元氏長慶集卷二十三

唐 元稹 撰

樂府 有序

詩訖於周離騷訖於楚是後詩之流為二十四名賦頌
銘贊文誄箴詩行詠吟題怨歎章篇操引謠謳歌曲詞
調皆詩人六義之餘而作者之旨由操而下八名皆起
於郊祭軍賓吉凶苦樂之際在音聲者因聲以度詞審

調以節唱句度短長之數聲韻平上之差莫不由之准
度而又別其在琴瑟者為操引採民𠂔者為謳謠備曲
度者總得謂之歌曲詞調斯皆由樂以定詞非選調以
配樂也由詩而下九名皆屬事而作雖題號不同而悉
謂之為詩可也後之審樂者往往採取其詞度為歌曲
蓋選詞以配樂非由樂以定詞也而纂撰者由詩而下
十七名盡編為樂錄樂府等題除鏡吹橫吹郊祀清商
等詞在樂志者其餘木蘭仲卿四愁七哀之輩亦未必

盡播於管絃明矣後之文人達樂者少不復如是配別
但遇興紀題往往兼以句讀短長為歌詩之異劉補闕
之樂府肇於漢魏按仲尼學文王操伯牙作流波水仙
等操齊牧犢作雉朝飛衛女作思歸引則不於漢魏而
後始亦以明矣况自風雅至於樂流莫非諷興當時之
事以貽後代之人沿襲古題唱和重複於文或有短長
於義咸為贅賸以證切尚不如寓意古題刺美見事猶有
詩人引古以諷之義焉曹劉沈鮑之徒時得如此亦復

稀少近代唯詩人杜甫悲陳陶哀江頭兵車麗人等凡
所歌行率皆即事名篇無復倚傍予少時與友人樂天
李公垂輩謂是為當遂不復擬賦古題昨梁州見進士
劉猛李餘各賦古樂府詩數十首其中一二十章咸有
新意予因選而和之其有雖用古題全無古義者若出
門行不言離別將進酒特書列女之類是也其或頗同
古義全創新詞者則田家止述軍輸捉捕詞先螻蟻之
類是也劉李二子方將極意於斯文因為粗明古今歌

詩同異之旨焉

和劉猛古題樂府十首

夢上天

夢上高高天
高高蒼蒼高不極
下視五嶽塊
纍纍仰天
依舊蒼蒼色
蹋雲聳身身更上
攀天上天攀未得
西瞻若水兔輪低
東望蟠桃海波黑
日月之光不到此
非暗非明烟塞塞
天悠地遠身跨風
下無階梯上無力
來時畏有他人上
截斷龍胡斬鵬翼
茫茫漫漫方自悲
哭向

青雲椎素臆哭聲厭咽旁人惡去聲喚起驚悲淚飄露千
慙萬謝喚旁人向使無君終不寤

冬白紵

吳宮夜長宮漏款簾幕四垂燈焰暖西施自舞王自管
雪紵翻翻鶴翎散上聲促節牽繁舞腰嬾舞腰嬾王罷飲

葢覆西施鳳花錦身作匡牀臂為枕朝珮音宗詩簾紵紫維懸

鐘磬之處以彩為犬牙其狀縱橫然故謂之縱玉王晏寢寢醒聞報門無事子

胥死後言為諱近王之臣諭王意共笑越王窮惴惴夜

夜抱冰寒不睡

將進酒

將進酒將進酒酒中有毒酖主父言之主父傷主母母
為妾地父妾天仰天俯地不忍言陽為僵踣主父前主
父不知加妾鞭旁人知妾為主說主將淚洗鞭頭血推
他雷反椎主母牽下堂扶妾遣升堂上牀將進酒酒中無
毒令主壽願主迴恩歸主母遣妾如此由主父妾為此
事人偶知自慙不密方自悲主今顛倒安置妾貪天僭

地誰不爲

採珠行

海波無底珠沉海採珠之人判死採萬人判死一得珠
斛量買婢人何在年年採珠珠避人今年採珠由海神
海神採珠珠盡死死盡明珠空海水珠為海物海屬神
神今自採何況人

董逃行

董逃董逃董卓逃措

丘皆切

鏗戈甲聲勞嘈剡剡

烏官切

深

臍脂焰焰人皆歎曰爾獨不憶年年取我身上膏膏銷
骨盡烟火死長安城中賊毛起城門四走公卿士走勸
劉虞作天子劉虞不敢作天子曹瞞篡亂從此始董逃
董逃人莫喜勝負相環相枕倚縫綴難成裁破易何況
曲針不能伸巧指欲學裁縫須準擬

憶遠曲

憶遠曲郎身不遠郎心遠沙隨郎飯俱在匙郎意看沙
那比飯水中書字無字痕君心暗畫誰會君况妾事姑

姑進止身去門前同萬里一家盡是郎腹心妾似生來
無兩耳妾身何足言聽妾私勸君君今夜夜醉何處姑
來伴妾自閉門嫁夫恨不早養兒將備老妾自嫁郎身
骨立老姑為郎求娶妾不忍見姑郎忍見為郎忍耐
看姑面

夫遠征

趙卒四十萬盡為坑中鬼趙王未信趙母言猶點新兵
更填死填死之兵兵氣索秦強趙破括敵起括雖專命

起尚輕何況牽肘之人牽不已坑中之鬼妻在營髻

以麻

約髻也

麻戴經驚雁鳴送夫之婦又行哭哭聲送死非送

行夫遠征遠征不必戍長城出門便不知死生

織婦詞

織夫

一作婦

何太忙蠶經三卧行欲老蠶神女聖早成絲

今年絲稅抽徵早早徵非是官人惡去歲官家事戎索
征人戰苦束刀瘡主將勲高換羅幕縹絲織帛猶努力
變緝撩機苦難織東家頭白雙女兒為解挑紋嫁不得

予掾荆時目擊貢綾
戶有終老不嫁之女
簷前嫋嫋游絲上有蜘蛛巧來

往羨他蟲豸

音雄

解緣天能向虛空織羅網

田家詞

牛吒吒

許角反

田确确旱塊敲牛蹄趵趵

音剝

種得官倉珠

顆穀六十年來兵族族月月食糧車轆轤一日官軍收

海服驅牛駕車食牛肉歸來收得牛兩角重鑄鋤犁作

斤劓

音竹又音卓

姑舂婦擔去輸官輸官不足歸賣屋願官

早勝讐早覆農死有兒牛有犢誓不遣官軍糧不足

俠客行

俠客不怕死怕在事不成事成不肯藏姓名我非竊賊
誰夜行白日堂堂殺袁盎九衢草草人面青此客此心
師海鯨海鯨露背橫滄溟海波分作兩處生分海減海
力俠客有謀人不識測三尺鐵蛇延二國

和李餘古題樂府九首

君莫非

鳥不解走獸不解飛兩不相解那得相譏犬不飲露蟬

不啖肥以蟬易犬蟬死犬饑燕在梁棟鼠在階基各自
窠窟人不能移婦好針縷夫讀書詩男翁女嫁卒不相
知懼聾摘耳効痛嘔眉我不非爾爾無我非

田野狐兔行

種豆耘鋤種禾溝

畎同又音旬

禾苗豆甲狐櫓兔剪割鵠

餒鷹烹麟啖犬鷹怕兔毫犬被狐引狐兔相須鷹犬相

盡

茲引反

日暗天寒禾稀豆損鷹犬就烹狐兔俱哂

當來日大難行

當來日大難行前有坂後有坑大梁側小梁傾兩軸相
絞兩輪相撐大牛豎小牛橫烏啄牛背足趺力寧
音能困屈
也當來日大難行太行雖險險可使平輪軸自撓牽制
不停泥潦漸久荆棘旋生行必不得不如不行

人道短

古道天道長人道短我道天道短人道長天道晝夜迴
轉不曾住春秋冬夏忙顛風暴雨電雷狂晴被陰暗月
奪日光往往星宿日亦堂堂天既職性命道德人自強

堯舜有聖德天不能遣壽命永昌泥金刻玉與秦始皇
周公傳說何不長宰相老聃仲尼何事栖遑莽卓恭顯
皆數十年富貴桑榆夫婦車馬煌煌若此顛倒事豈非
天道短豈非人道長堯舜留得神聖事百代天子有典
章仲尼留得孝順語千年萬歲父子不敢相滅亡沒後
千餘載唐家天子封作文宣王老君留得五千字子孫
萬萬稱聖唐諡作玄帝魂魄坐天堂周公周禮二十卷
有能行者知紀綱傳說說命三四紙有能師者稱祖宗

天能天人命人使道無窮若此神聖事誰道人道短豈
非人道長天能種百草猶得十年有氣息舜纔一日芳
人能揀得丁沉蘭蕙料理百和香天解養禽獸餒虎豹
豺狼人解和麴蘖充禘祀烝嘗杜鵑無百作天遣百鳥
哺雛不遣哺鳳皇巨蟒壽千歲天遣食牛吞象充腹腸
蛟螭與變化鬼怪與隱藏蚊蚋與利觜枳棘與鋒銑賴
得人道有揀別信任天道眞茫茫若此撩亂事豈非天
道短賴得人道長

苦樂相倚曲

古來苦樂之相倚近於掌上之十指君心半夜猜恨生
荆棘滿懷天未明漢成眼瞥飛燕時可憐班女恩已衰
未有因由相決絕猶得半年佯暖熱轉將深意諭旁人
緝綴疵瑕遣潛說一朝詔下辭金屋班姬自痛何倉卒
呼天俯地將自明不悟尋時已銷骨白首宮人前再拜
願將日月相輝解苦樂相尋晝夜間燈光那有天明在
主今被奪心應苦妾奪深恩初為主欲知妾意恨主時

主今為妾思量取班姬收淚抱妾身我曾排擯無限人

出門行

兄弟同出門同行不同志悽悽分岐路各各營所為兄
上荆山巔翻石辨虹氣弟沉滄海底偷珠待龍睡出門
不數年同歸亦同遂俱用私所珍升沉自茲異獻珠龍
王宮值龍覓珠次但喜復得珠不求珠所自酬客雙龍
女授客六龍轡遣充行雨神雨澤隨客意零夏鐘鼓繁
榮

音容又
去聲

秋玉帛積

音

彩色畫廊廟奴僮被珠翠驥駉

千萬雙鴛鴦七十二言者未搖舌無人敢輕議其兄因
獻璞再刖不履地門戶親戚疎匡牀妻妾棄銘心有所
待視足無所媿持璞自枕頭淚痕雙血漬一朝龍醒寤
本問偷珠事因知行雨偏妻子五刑備仁兄捧屍哭勢
友掉頭諱喪車黔首葬弔客青蠅至楚有望氣人王前
忽長跪賀王得貴寶不遠王所莅求之果如言剖出浮
筠臍白珩無顏色垂棘有瑕累在楚裂地封入趙連城
貴秦遣李斯書書為傳國瑞秦亡漢魏傳傳者得神器

卞和名永永與寶不相墜勸爾出門行行難莫行易易
得還易失難同亦難離去聲善賈識貪廉良田無植穉磨
劍莫磨錐磨錐成小利

捉捕歌

捉捕復捉捕莫捉狐與兔狐兔藏窟穴豺狼妨道路
路非不妨最憂螻蟻聚豺狼不陷穽螻蟻潛幽蠹切切
主人窓主人輕細故延緣蝕櫟樞漸入棟梁柱梁棟盡
空虛攻穿痕不露主人坦然意晝夜安寢寤網羅布參

差鷹犬走迴互盡力窮窟穴無心自還顧客來歌捉捕
歌竟淚如雨豈是惜狐兔畏君先後誤願君掃梁棟莫
遣螻蟻附次及清道途盡滅豺狼步主人堂上坐行客
門前度然後巡野田遍張畋獵具外無梟獍援內有熊
羆驅狡兔掘荒榛妖狐薰古墓用力不足多得禽自無
數畏君聽未詳聽客有明喻蟣虱誰不輕鯨鯢誰不惡
在海尚幽遐在懷交穢污歌此勸主人主人那不悟不
悟還更歌誰能恐違忤

古築城曲五解

年年塞下丁長作出塞兵自從冒

音墨頓

特音

強官築遮虜

城

築城須努力城高遮得賊但恐賊路多有城遮不得

丁口傳父口莫問城堅不

音岳

平城被虜圍漢斫

音竹又音卓

城牆走

因茲請休和虜往騎來過半疑兼半信築城猶差我

築城安敢煩願聽丁一言請築鴻臚寺兼愁虜出關

估客樂

估客無住著有身則行出門求火伴入戶辭父兄父

兄相教示求利莫求名求名有所避求利無不營火伴

相勒縛賣假莫賣誠交關但交假本生上聲得失輕自茲

相將去誓死意不更亦解市頭語便無鄉里情鑰音偷


銅似金者切石打臂釧充綸糯米吹項瓔歸來村中賣敲作金

玉聲村中田舍娘貴賤不敢爭所費百錢本已得十倍

贏顏色轉光靜飲食亦甘馨子本頻蕃息貨販日兼并

求珠駕滄海採玉上荆衡北買党項馬西擒吐蕃鸚炎
洲布火浣蜀地錦織成越婢脂肉滑奚僮眉眼明通算
衣食費不計遠近程經遊天下徧却到長安城城中東
西市聞客次第迎迎客兼說客多財為勢傾客心本明
黠聞語心已驚先問十常侍次求百公卿侯家與主第
點綴無不精歸來始安坐富與王者勅市卒酒肉臭縣
胥家舍成豈唯絕言語奔走極使令大兒販材木巧識
梁棟形小兒販鹽鹵不入州縣征一身偃市利突若截

海鯨鈎距不敢下下則牙齒橫生為估客樂判爾樂一
生爾又生兩子錢刀何歲平



元氏長慶集卷二十三

欽定四庫全書

集部

元氏長慶集卷二十四至

七

詳校官監察御史_臣查瑩

檢討_臣何思鈞覆勘

總校官知縣_臣繆琪

校對官中書_臣雷純

謄錄監生_臣莫與儔

欽定四庫全書

元氏長慶集卷二十四

唐 元稹 撰

樂府

連昌宮詞

連昌宮中滿宮竹歲久無人森似束又有牆頭千葉桃
風動落花紅款款宮邊老人爲予泣小年進食曾因入
上皇正在望仙樓太真同凭欄千立樓上樓前盡珠翠

炫轉熒煌照天地歸來如夢復如癡何暇備言宮裏事

初過寒食一百六店舍無烟宮樹綠夜半月高絃索鳴

賀老琵琶定場屋

唐開元中賀懷智善琵琶

力士傳呼覓念奴念奴

潛伴諸郎宿須臾覓得又連催特勅街中許然燭春嬌

滿眼睡紅綃掠削雲鬟旋裝束飛上九天歌一聲二十

五郎吹管逐逡巡大遍涼州徹色色龜

音丘

茲

音慈

轟錄續

李暮

謨同

摩

益涉切指接也笛傍宮牆偷得新翻數般曲

念奴天寶中名

倡善歌每歲樓下酺宴累日之後萬衆喧隘嚴安之韋黃裳輩闕易不能禁衆樂為之罷奏玄宗遣高力士大

呼於樓上曰欲遣念奴唱歌卽二十五郎吹小管逐看人能聽否未嘗不悄然奉詔其為當時所重也如此然而玄宗不欲奪俠遊之盛未嘗置在宮禁或歲幸湯泉時巡東洛有司潛遣從行而已又玄宗嘗於上陽宮夜後按新翻一曲屬明夕正月十五日潛遊燈下忽聞酒樓上有笛奏前夕新曲大駭之明日密遣捕捉笛者詰驗之自云其夕竊於天津橋詵月聞宮中度曲遂於橋柱上挿譜記之臣即長安少年善笛者李謩也玄宗異之遣

平明大駕發行宮萬人歌舞途路中百官隊仗避

岐薛

岐王範薛王業玄宗之弟

楊氏諸姨

貴妃三姊帝呼為姨封韓虢秦國三夫人

車闕

風明年十月東都破

天寶十三年祿山破洛陽

御路猶存祿山過驅

令供頓不敢藏萬姓無聲淚潛墮兩京定後六七年却

尋家舍行宮前莊園燒盡有枯井行宮門閉樹宛然爾

後相傳六皇帝

肅代德
順憲穆

不到離宮門久閉往來年少說

長安玄武樓成花萼廢去年勅使因斫竹偶值門開暫

相逐荆榛櫛比塞池塘狐兔驕癡緣樹木舞榭歌傾基

尚在文憲窈窕紗猶綠塵埋粉壁舊花鈿烏啄風箏碎

珠玉上皇偏愛臨砌花依然御榻臨階斜蛇出燕巢盤

鬬拱菌生香案正當衙寢殿相連端正樓太真梳洗樓

上頭晨光未出簾影黑至今反挂珊瑚鉤指示傍人因

慟哭却出宮門淚相續自從此後還閉門夜夜狐狸上
門屋我聞此語心骨悲太平誰致亂者誰翁言野父何
分別耳聞眼見為君說姚崇宋璟作相公勸諫上皇言
語切燮理陰陽永泰豐調和中外無兵戎長官清平太
守好揀選皆言由至公開元之末姚宋死朝廷漸漸由
妃子祿山宮裏養作兒號國門前鬧如市弄權宰相不
記名依稀憶得楊與李廟謨顛倒四海搖五十年來作
瘡痛

羽委切

今皇神聖丞相明詔書纔下吳蜀平官軍又

取淮西賊此賊亦除天下寧年年耕種宮前道今年不
遣子孫耕老翁此意深望幸努力廟謀休用兵

望雲騅馬歌

并序

德宗皇帝以八馬幸蜀

興元元年二月丁卯李懷光反帝自奉天如梁州

七馬

道斃唯望雲騅來往不頓貞元中老死天廄臣稹作歌
以記之

憶昔先皇幸蜀時八馬入谷七馬疲肉綻筋攣四蹄脫
七馬死盡無馬騎天子蒙塵天雨泣巉岵

魚咸切

道路淋

漓濕崢嶸白草眇難期

于弄切

洞黃泉安可入

白草謔洞並雜

谷中地名古謬云謔洞入黃泉

朱泚圍兵抽未盡懷光冠騎追行及嬪

娥相顧倚樹啼鷓鴣無聲仰天立圍人初進望雲騅形

色顛顚衆馬欺上前噴吼如有意耳尖卓立節踈奇君

王試遣迴曾臆撮骨鋸牙駢兩肋蹄懸四跼

或作矩

腦顚

方勝聳三山尾株直圍人畏諂仍相惑此馬無良空有

力頻頻嚙掣轡難施往往跳趨

丘妖切

鞍不得色沮聲悲

仰天訴天不遣言君未識亞身受取白玉羈開口銜將

紫金勒君王自此方敢騎似遇良臣久悽惻龍騰魚鼈

啍然驚驥盼

音焚大首貌

驢騾少顏色七聖心迷運方厄

五丁力盡路猶窄橐它山上斧刃堆望秦嶺下錐頭石

五六百里真符縣八十四盤青山驛掣開流電有輝光

突過浮雲無朕跡地平險盡施黃屋九九屬車十二纛

齊映前導引驢頭

帝自奉天奔梁道險澁映常為帝御會馬駭突帝命捨轡映曰馬奔蹊不

過傷臣捨之或驚清蹕

嚴震迎號抱驢足

時震為山南西道節度使聞帝從蹕馳表奉迎

路傍垂白天寶民望驢禮拜見驢哭皆言玄宗當時無

此馬不免騎驟來幸蜀雄雄猛將李令公

李晟

收城殺賊

豺狼空天旋地轉日再中天子却坐明光宮朝廷無事

忘征戰校獵朝迴暮毬宴御馬齊登擬用槽

廐中號乘輿之馬曰

擬用槽

君王自試宣徽殿圉人還進望雲騅性強步闊無

方便分驥擺杖頭太高擘肘迴頭項難轉人人共惡難

迴跋潛遣飛龍減芻秣銀鞍繡韉

昌艷切鞍下障泥者

不復施空

盡

茲引反

天年御槽活當時鄒諺已有言莫倚功高浪開

閣登山縱似望雲騅平地須饒紅叱撥長安三月花垂

草果下翩翩紫騮好千官煖熟李令間

平朱泚之後天子既厭兵患將

臣生事而張延賞當國復與晟有隙勸帝奪其兵柄

百馬生獐

音能

望雲老望雲騅

爾之種類世世奇當時項王乘爾祖分配英豪稱霸王
爾身今日逢聖人從幸巴渝歸入秦功成事遂身退天
之道何必隨羣逐隊到死蹋紅塵望雲騅用與不用各
有時爾勿悲

和李校書新題樂府十二首

并序

予友李公垂貺予樂府新題二十首雅有所謂不虛為

文予取其病時之尤急者列而和之蓋十二而已昔三代之盛也士議而庶人謗又曰世理則詞直世忌則詞隱予遭理世而君盛聖故直其詞以示後使夫後之人謂今日為不忌之時焉

上陽白髮人

天寶年中花鳥使

天寶中密號採取
艷異者為花鳥使

撿花狎鳥含春思

滿懷墨詔求嬪御走上高樓半酣醉酣醉直入卿士家
閨闈不得偷迴避良人顧妾心死別小女呼爺血垂淚

十中有一得更衣永配深宮作宮婢御馬南奔胡馬蹙
宮女三千合宮棄宮門一閉不復開上陽花草青苔地
月夜間聞洛水聲秋池暗度風荷氣日日長看提象門
終身不見門前事近年又送數人來自言興慶南宮至
我悲此曲將徹骨更想深冤復酸鼻此輩賤嬪何足言
帝子天孫古稱貴諸王在閤四十年七宅六宮門戶闕

隋煬枝條襲封邑

近古封前代子孫為二王三恪

肅宗血胤無官位

肅宗

已後諸王並未出閤

王無妃媵主無壻陽亢陰淫結災累何如決

壅順衆流女遣從夫男作吏

華原磬

李傳云天寶中始廢
泗濱磬用華原石

泗濱浮石裁為磬古樂疎音少人聽工師小賤牙曠稀
不辨邪聲嫌雅正正聲不屈古調高鍾律參差管絃病
鏗金戛瑟徒相雜投玉敲冰杳然震華原軟石易追琢
高下隨人無雅鄭棄舊美新由樂胥自此黃鍾不能競
玄宗愛樂愛新樂梨園弟子承恩橫霓裳纔徹胡騎來
雲門未得蒙親定我藏古磬藏在心有時激作南風詠

伯夔曾撫野獸馴仲尼暫和春雷盛何時得向筍簾懸
為君一吼君心醒願君每聽念封疆不遣豺狼勦人命

五絃彈

趙壁五絃彈徵調徵聲巉絕何清峭辭雄皓鶴警露啼
失子哀猿繞林嘯風入春松正凌亂鶯含曉舌憐嬌妙
嗚嗚暗溜咽冰泉殺殺霜刀澁寒鞘促節頻催漸繁撥
珠幢斗絕金鈴掉千鞞鳴鏑發胡弓萬片清球擊虞廟
衆樂雖同第一部德宗皇帝常偏召旬休節假暫歸來

一聲狂殺長安少主第侯家最難見按

蘇雷反

歌按曲皆

承詔水精簾外教貴嬪瑋筵心伴中要臣有五賢非
此絃或在拘囚或屠釣一賢得進勝累百兩賢得進同
周邵三賢事漢滅暴強四賢鎮岳寧邊徼五賢並用調
五常五常旣序三光曜趙璧五絃非此賢九九何勞設
庭燎

西涼伎

吾聞昔日西涼州人烟撲地桑柘稠蒲萄酒熟恣行樂

紅豔青旗朱粉樓樓下當壚稱卓女樓頭伴客名莫愁
鄉人不識離別苦更卒多為沉滯游哥舒開府設高宴
八珍九醞當前頭前頭百戲競撩亂九劍跳躑霜雪浮
師子搖光毛彩豎胡姬醉舞筋骨柔大宛來獻赤汗馬
贊普亦奉翠茸裘一朝燕賊亂中國河湟忽盡空遺丘
開遠門前萬里堠今來感到行原州

平時開遠門外立堠云去安西九千

九百里以示戎人不為萬里行其就盈故矣

去京五百而近何其逼天子縣

內半沒為荒陬西涼之道爾阻脩連城邊將但高會每

聽此曲能不羞

法曲

吾聞黃帝鼓清角弭伏熊羆舞玄鶴舜持干羽苗革心
堯用咸池鳳巢閣大夏濩武皆象功功多已訝玄功薄
漢祖過沛亦有歌秦王破陣非無作作之宗廟見艱難
作之軍旅傳糟粕明皇度曲多新態宛轉浸淫易沉著
赤白桃李取花名霓裳羽衣號天落雅弄雖云已變亂
夷音未得相參錯自從胡騎起烟塵毛毳腥羶滿咸洛

女為胡婦學胡粧伎進胡音務胡樂

音岳

火鳳聲沉多咽

絕春鶯轉罷長蕭索胡音胡騎與胡粧五十年來競紛泊

馴犀

李傳云貞元丙子歲南海來貢至十三年冬苦寒死于苑中

建中之初放馴象遠歸林邑近交廣獸返深山鳥構巢
鷹鵬鷁鵠無羈鞅貞元之歲貢馴犀上林置圈官司養
玉盆金棧非不珍虎啖狴牢魚食網渡江之橘踰汶貉
反時易性安能長臘月北風霜雪深蹢躅鱗身遂長往
行地無疆費傳驛通天異物罹幽枉乃知養獸如養人

不必人人自敦獎不擾則得之於理不奪有以多於賞
脫衣推食衣食之不若男耕女令紡堯民不自知有堯
但見安閒聊擊壤前觀馴象後觀犀理國其如指諸掌

立部位

李傳云太常選坐部位無性靈者退入
立部位又選立部位無性靈者退入雅

樂可知矣李君
作歌以諷焉

胡部新聲錦筵坐中庭漢振高音播太宗廟樂傳子孫
取類羣凶陣初破戰戰攢鎗霜雪耀騰騰擊鼓風雷磨
初疑遇敵身啟行終象由文士憲左昔日高宗常立聽

曲終然後臨玉座如今節將一掉頭電捲風收盡摧挫

宋晉鄭友歌聲發滿堂會客齊喧歌

虛可切

珊瑚佩玉動

腰身一一貫珠隨咳唾頃向園丘見郊祀亦曾正旦親

朝賀太常雅樂備宮懸九奏未終百寮情恣懣難令季

札辨遲迴但恐文侯臥工師盡取聾昧人豈是先王作

之過宋沆嘗傳天寶季法曲胡音忽相和明年十月燕

寇來元廟千門虜塵浣

烏臥切泥着物也。太常丞宋沆傳漢中王舊說云玄宗雖雅

好度曲然而未嘗使蕃漢雜奏天寶十三載始詔道調法曲與胡部新聲合作識者異之明年祿山叛我

聞此語歎復泣古來邪正將誰奈
奸聲入耳佞人心侏
儒飽飯夷齊餓奈乃箇切

驃國樂

李傳云貞元辛巳歲始來獻

驃之樂器頭象駝音聲不合十二和從舞跳趨筋節硬
繁詞變亂名字訛千彈萬唱皆咽咽左旋右轉空傖傖
俯地呼天終不會曲成調變當如何德宗深意在柔遠
笙鏞不御停嬪娥史館書為朝貢傳太常編入鞞鞞科
古時陶堯作天子遜遁親聽康衢歌又遣道人持木鐸

遍採謳謠天下過

音戈

萬人有意皆洞達四嶽不敢施煩

苛盡令區中擊壤塊燕及海外覃恩波秦霸周衰古官
廢下堙上塞王道頗共矜異俗同聲教不念齊民方薦
瘥傳稱魚鼈亦咸若苟能効此誠足多借如牛馬未蒙
澤豈在抱甕滋黿鼉教化從來有源委必將泳海先泳
河非是倒置自中古驃兮驃兮誰爾訶

胡旋女

李傳云天寶中西國來獻

天寶欲未胡欲亂胡人獻女能胡旋旋得明王不覺迷

妖胡奄到長生殿胡旋之義世莫知胡旋之容我能傳

蓬斷霜根羊角疾竿戴朱盤火輪炫驪珠迸珥逐龍星

虹降音暈輕巾掣流電潛鯨暗喻宜殘謝反海波迴風亂舞

當空霰萬過其誰辨終始四座安能分背面才人觀者

相為言承奉君恩在圓變是非好惡隨君口南北東西

逐君盼柔軟依身看珮帶徘徊繞指同環釧音串佞臣聞

此心計迴惑亂君心君眼眩君言似曲屈如鉤君言好

直舒為箭巧隨清影觸處行好學春鶯百般囀傾天側

地用君力抑塞周遮恐君見翠華南幸萬里橋玄宗始

悟坤維轉

僧一行嘗奏玄宗曰陛下行幸萬里聖祚無疆故天寶中歲幸洛陽冀充盈數及上幸蜀

至萬里橋乃數謂左右曰一行之奏其是乎

寄言旋目與旋心有國有家當

共譴

蠻子朝

李傳云貞元末蜀川始通蠻酋

西南六詔

蒙嵩詔越析詔浪穹詔
濛賧詔施浪詔蒙舍詔

有遺種僻在荒陬路

尋壅部落支離君長賤比諸夷狄為幽冗犬戎強盛頻

侵削降有憤心戰無勇夜防鈔盜保深山朝望烟塵上

高冢鳥道繩橋來款附非因慕化因為悚清平官擊金

呿

丘加切
又音虛

嗟求天叩地持雙珙益州大將韋令公韋阜頃

實遭時定汧隴自居劇鎮無他績幸得蠻來固恩寵為

蠻開道引蠻朝接蠻送蠻常繼踵天子臨軒四方賀朝

廷無事唯端拱漏天走馬春雨寒瀘水飛蛇瘴烟重椎

頭醜類除憂患瘡足役夫勞洶湧匈奴互市歲不供雲

蠻通好轡長駮

音疎搖
街走馬

戎王養馬漸多年南人耗額西

人恐

縛戎人

近制西邊每擒蕃囚例皆傳置南方不加勦戮故李君作歌以諷焉

邊頭大將差健卒入抄擒生快於鶻但逢頰

丑成切赤色

面

即捉來半是蕃人半戎羯大將論功重多級捷書飛奏

何超忽聖朝不殺諧至仁遠送炎方示微罰萬里虛勞

肉食費連頭盡被氊裘暍

阿葛切

華茵重席臥腥臊病犬

愁鴣聲咽嗚中有一人能漢語自言家本長安窟少年

隨父戍安西河渭瓜沙眼看沒天寶未亂前數載狼星

四角光蓬勃中原禍作邊防危果有豺狼四來伐蕃馬

臆卑遙切
肥也

成正翹健蕃兵肉飽爭唐突烟塵亂起無亭

燧主帥驚跳棄旄鉞半夜城摧鵝雁鳴妻啼子叫曾不

歇陰森神廟未敢依脆薄河冰安可越荆棘深處共潛

身前困疾藜後髀脆平明蕃騎四面走古木深林盡株

楫音骨少壯為俘頭被髡老翁留居足多刖烏鳶滿野屍

狼籍樓榭成灰牆突兀暗水濺濺入舊池平沙漫漫鋪

明月戎王遣將來安慰口不敢言心咄咄供進脰脰音夜

御叱般豈料穹廬揀肥腩音突五六十日消息絕中間盟

會又猖獗眼穿東日望堯雲腸斷正朝梳漢髮

延州鋪李如暹

蓬子將軍之子也嘗沒西蕃及歸自云蕃法唯正歲一日許唐人沒蕃者服衣冠如暹當此日由是悲不自勝

遂與蕃妻密定歸計

近來如此思漢者半為老病半埋骨尚教孫

子學鄉音猶話平時好城闕老者儻盡少者壯生長蕃

中似蕃悖

音李

不知祖父皆漢民便恐為蕃心矻矻緣邊

飽餒十萬衆何不齊驅一時發年年但捉兩三人精衛

銜蘆塞溟渤

陰山道

李傳云元和二年有詔悉以金銀酬回紇馬價

年年買馬陰山道馬死陰山帛空耗元和天子念女工
內出金銀代酬犒臣有一言昧死進死生甘分答恩燾
費財為馬不獨生耗帛傷工有他盜臣聞平時七十萬
匹馬關中不省聞嘶譟四十八監選龍媒時貢天庭付
良造如今垌野十無一盡在飛龍相踐暴萬束蔦焚供
旦暮千鍾菽粟長牽漕屯軍郡國百餘鎮縑緗歲奉春
冬勞稅戶逋逃例攤配官司折納仍貪冒挑紋變縑力
倍費棄舊從新人所好越穀繚綾織一端十足素縑功

未到豪家富賈踰常制
令族親班無雅操從騎愛奴絲
布衫臂鷹小兒雲錦韜羣臣利
已要差僭天子深衷空
閔悼綽立花塼鵷鳳行雨露恩
波幾時報

元氏長慶集卷二十四

欽定四庫全書

元氏長慶集卷二十五

唐 元稹 撰

樂府

有鳥二十章

庚寅

有鳥有鳥名老鴟鴞張貪狠老不衰似鷹指爪唯攫肉
戾天羽翮徒翰飛朝偷暮竊恣昏飽後顧前瞻高樹枝
珠丸彈射死不去意在護巢魚護兒

有鳥有鳥毛似鶴行步雖遲性靈惡主人但見閒慢容

許占蓬萊最高閣弱羽長憂俊鵲拳疽腸暗著

一作鵲把

雛啄千年不死伴靈龜臬心鶴貌何人覺

有鳥有鳥如鸛雀食蛇抱磐

音殼山多大石

天姿惡行經水滸

為毒流羽拂酒盃為死藥漢后忍渴天豈知驪姬墳地

君寧覺嗚呼為有白色毛亦得乘軒謬稱鶴

有鳥有鳥名為鳩毛衣軟毳心性柔鵲緣暖足憐不喫

鷄為同科曾共游飛飛漸上高高閣百鳥不猜稱好述

佳人許伴鷓鴣雛食望爾化為張氏鈞

有鳥有鳥名野雞天姿耿介行步齊主人偏養憐整頓
玉粟充腸瑤樹栖池塘潛狎不鳴雁津梁暗引無用鵜
秋鷹迸逐霜鶻遠鵬鳥護巢當晝啼主人頻問遣妖術
力盡計窮音響悽當時何不早量音良分莫遣輝光深照
泥

有鳥有鳥羣翠碧毛羽短長心並窄皆曾偷食渌池魚
前去後來更逼迫食魚滿腹各自飛池上見人長似客



飛飛競占嘉樹林百鳥不爭緣鳳惜

有鳥有鳥羣紙鳶因風假勢童子牽去地漸高人眼亂
世人為爾羽毛全風吹繩斷童子走餘勢尚存猶在天
愁爾一朝還到地落在深泥誰復憐

有鳥有鳥名啄木木中求食常不足徧啄鄧林求一蟲
蟲孔未穿長觜秃木皮已穴蟲在心蟲蝕木心根柢覆
可憐樹上百鳥兒有時飛向新林宿

有鳥有鳥衆蝙蝠長伴佳人占華屋妖鼠多年羽翮生

不辨雌雄無本族穿墉伺隙善潛身晝伏宵飛惡明燭
大廈雖存柱石傾暗嚙棟梁成蠹木

有鳥有鳥名為鴝深藏孔穴難動搖鷹鷂遶樹探不得
隨珠彈盡聲轉嬌主人煩惑罷擒取許占神林為物妖
當時幸有燎原火何不鼓風連夜燒

有鳥有鳥名燕子口中未省無泥滓春風吹送廊廡間
秋社驅將嵌孔裏雷驚雨灑一時蘇雲壓霜摧半年死
驅去驅來長信風暫託棟梁何用喜

有鳥有鳥名老烏貪癡突諄天下無田中攫肉吞不足

偏入諸巢探衆雛歸來仍占主人樹腹飽巢高聲響麤

倉胡切

山鷓野鵲閒受肉鳳皇不得聞罪辜秋鷹掣斷架

上索利爪一揮毛血落可憐鷓鵲慕腥膻猶向巢邊競
紛泊

有鳥有鳥謂白鵬雪毛皓白紅觜殷

暗音

貴人妾婦愛光

彩行提坐臂怡朱顏妖姬謝寵辭金屋彫籠又伴新人
宿無心為主擬銜花空長白毛映紅肉

有鳥有鳥羣雀兒中庭啄粟籬上飛秋鷹欺小嫌不食
鳳皇容衆從爾隨大鵬忽起遮白日餘風簸蕩山岳移
翩翹百萬徒驚噪扶搖勢遠何由知古來妄說銜花報
縱解銜花何所為可惜官倉無限粟伯夷餓死黃口一作

鳥肥

有鳥有鳥皆百舌舌端百轉聲咄啞

音質

先春盡學百鳥

啼真偽不分聽者悅伶倫鳳律亂宮商蟠木天雞誤時
節朝朝暮暮主人耳桃李無言管絃咽五月炎光朱火

盛陽焰燒陰幽響絕安知不是卷古星化作剛刀一時
截

有鳥有鳥毛羽黃雄者為鴛鴦者鴛主人併養七十二
羅列彫籠開洞房雄鳴一聲鷓鼓翼夜不得栖朝不食
氣息榻然雙翅垂猶入籠中就顏色

有鳥有鳥名鵲雛鈴子眼精蒼錦襦貴人腕軟憐易臂
奮肘一揮前後呼俊鵲無由拳狡兔金鵬不得擒魁狐
文王長在苑中獵何日非熊休賣屠

有鳥有鳥名鸚鵡養在雕籠解人語主人曾問私所聞
因說妖姬暗欺主主人方惑翻見疑趨歸隴底雙翅垂
山鴟野雀怪鸚語競噪爭窺無已時君不見隋朝隴頭
姥嬌養雙鸚囑新婦一鸚曾說婦無儀悍婦殺鸚欺主
母一鸚閉口不復言母問不言何太久鸚言悍婦殺鸚
由母為逐之鄉里醜當時主母信爾言顧爾微禽命何
有今之主人翻爾疑何事籠中漫開口

有鳥有鳥名俊鸚鵡小鵬癡俊無匹雛鴨拂爪血迸天

狡兔中拳頭粉骨平明度海朝未食挾上秋空雲影沒
瞥然飛下人不知攪碎荒城魁狐窟

有鳥有鳥真白鶴飛上九霄雲漠漠司晨守夜悲雞犬
啄腐吞腥笑鵬鷃堯年值雪度關山晉室聞琴下寥廓
遼東盡爾千歲人悵望橋邊舊城郭

有酒十章

有酒有酒雞初鳴夜長睡足神慮清悄然危坐心不平
浩思一氣初彭亨頌洞浩汗真無名胡不終渾成胡為

沉濁以升清，矗然分畫高。下程天蒸地，鬱羣動萌毛。鱗

髀介如鬣。

音振鬣音能鬣亂也

嗚呼萬物紛已生，我可奈何兮。

杯一傾。

有酒有酒東方明，一杯既進吞元精。尚思天地之始名，

一元既二分。濁清地居方，直天體明胡不八荒打打。

他頂

切平也

如砥平，胡山高屹崕。海泓澄，胡不日車杲杲晝夜。

行胡為月輪滅，缺星睺。

盲猛二音

音振俱視貌

嗚呼不得真宰。

情我可奈何兮，杯再傾。

有酒有酒兮湛淥波飲將愉兮氣彌和念萬古之紛羅
我獨慨然而浩歌歌曰天耶地耶肇萬物耶儲胥大庭
之君耶恍耶忽耶有耶傳而信耶久而謬耶文字生而
義農作耶仁義別而聖賢出耶炎始暴耶蚩尤熾耶軒
轅戰耶不得已耶仁耶聖耶愍人之毒耶天蕩蕩耶堯
穆穆耶豈其讓耶歸有德耶舜其貪耶德能嗣耶豈其
讓耶授有功耶禹功大耶人戴之耶益不逮耶啟能德
耶家天下耶榮後嗣耶於後嗣之榮則可耶於天下之

榮其可耶嗚呼遠堯舜之日耶何棄舜之速耶辛癸虐
耶湯武革耶順天意耶公天下耶踵夏桀嗣私其公耶
並建萬國均其私耶專征遽伐闕海內耶秦掃其類威
定之耶二代而殞守不仁耶漢魏而降乘其機耶短長
理亂繫其術耶堯耶舜耶終不可逮耶將德之者不位
位者不逮其德耶時耶時耶其可耶我可奈何兮一
杯又進歌且歌

有酒有酒兮黯兮溟仰天大呼兮天漫漫兮高兮青高

兮漫兮吾孰知天否與靈取人之仰者無乃在乎昭昭
乎曰與夫日星何三光之並照兮奄雲雨之冥冥幽妖
倏忽兮水怪族形鼃鼃岸走兮海若鬪鯨河漬漬兮愈
濁濟翻翻兮不寧虵噴雲而出穴虎嘯風兮屢鳴汗高
巢而鳳去兮溺厚地而芝蘭以之不生葵心傾兮何向
松影直而孰明人懼愁兮戴榮天寂默兮無聲嗚呼天
在雲之上兮人在雲之下兮又安能決雲而上征嗚呼
既上征之不可兮我奈何兮杯復傾

有酒有酒香滿尊君寧不飲開君顏豈不知君飲此心
恨君今獨醒誰與言君寧不見颶風翻海火燎原巨鼇
唐突高焰延精衛銜蘆塞海溢枯魚噴沫救池燔筋疲
力竭波更大鰭焦甲裂身已乾有翼勸爾升九天有鱗
勸爾登龍門九天下視日月轉龍門上激雷雨奔塘蚺
雖怒誰爾懼鵑旦雖啼誰爾憐搏空意遠風來壯我可
奈何兮一杯又進消我煩

有酒有酒歌且哀江春例早多早梅櫻桃桃李相續開

間以木蘭之秀香徘徊東風吹盡南風來鶯聲漸澁花
摧墮四月清和豔殘卉芍藥翻紅蒲映水夏龍痛毒雷
雨多蒲葉離披豔紅死紅豔猶存榴樹花紫苞欲綻高
筍牙筍牙成竹冒霜雪榴花落地還銷歇萬古盈虧相
逐行君看夜夜當窻月榮落虧盈可奈何生成未遍霜
霰過霜霰過兮無奈何靈芝變絕荆棘多荆棘多兮可
奈何可奈何兮終奈何秦皇堯舜俱腐骨我可奈何兮
又進一杯歌復歌

有酒有酒方爛漫飲酣拔劍心眼亂聲若雷
碑目流電醉舞翻環身眩轉乾綱倒軋坤維旋
去聲白日橫空星宿見一夫心醉萬物變何况蚩尤之蹴蹋安得不以熊羆戰
嗚呼風后力牧得親見我可奈何兮又進一杯除健羨

有酒有酒兮告臨江風漫漫兮波長渺渺兮注海海蒼蒼兮路茫茫彼萬流之混入兮又安能分若畎澮淮河與夫岷吳之巨江味作鹹而若一雖甘淡兮誰謂爾為

良濟涓涓而縷貫將奈何兮萬里之渾黃鯨歸穴兮勃
溢鼇載山兮低昂陰火然兮衆族沸渭颶風作兮晝夜
猖狂顧千珍與萬怪兮皆委潤而深藏信天地之瀦蓄
兮我可奈何兮一杯又進兮包大荒

有酒有酒兮日將落餘光委照在林薄陽烏撩亂兮屋
上栖陰怪跳躑兮水中躍月爭光兮星又繁燒橫空兮
焰仍爍我可奈何兮時既昏一杯又進兮聊處廓

有酒有酒兮再祝祝予心兮何欲欲天泰而地寧欲人

康而歲熟欲鳳翥而鵷隨兮欲龍亨而驥逐欲日盛而
星微兮欲滋蘭而殲毒欲人欲而天從苟天未從兮我
可奈何兮一杯又進聊自足

華之巫

景戌

有一人兮神之側廟森森兮神默默神默默兮可奈何
願一見神兮何可得女巫索我何所有神之開閉予之
手我能進若神之前神不自言寄予口爾欲見神安爾
身買我神錢沽我酒我家又有神之盤爾進此盤神爾

安此盤不進行路難陸有摧車舟有瀾我聞此語長太
息豈有神明欺正直爾居大道誰南北恣矯神言假神
力假神力兮神未悟行道之人不得度我欲見神誅爾
巫豈是因巫假神祐爾巫爾巫獨不聞乎其媚於
輿不若媚於竈使我傾心事爾巫吾寧驅車守吾道爾
巫爾巫且相保吾心自有丘之禱

廟之神

我馬煩兮釋我車神之廟兮山之阿予一拜而一祝祝

予心之無涯涕洟瀾而零落神寂默而無譁神兮神兮
奈神之寂默而不言何復再拜而再祝鼓吾腹兮歌吾
歌歌曰今耶古耶有耶無耶福不自神耶神不福人耶
巫爾惑耶稔而誅耶謁不得耶終不可謁耶返吾駕而
遵吾道廟之木兮山之花

元氏長慶集卷二十五

欽定四庫全書

元氏長慶集卷二十六

唐 元稹 撰

樂府

村花晚 庚寅

三春已暮桃李傷棠梨花白蔓菁黃村中女兒爭摘將

挿刺頭鬢相誇張田翁蠶老迷臭香曬暴斂

於葉切 斂 尼輒

切 薰衣裳非無後秀與孤芳奈爾千株萬頃之茫茫天

公此意何可量長教爾輩時節長

紫躑躅

紫躑躅滅紫櫳裙倚山腹文君新寡乍歸來羞怨春風
不能哭我從相識便相憐但是花叢不迴目去年春別

湘水頭今年夏見青山曲

青山驛名

迢迢遠在青山上山高

水濶難容足願為朝日早相暎願作輕風暗相觸爾躑
躑我向通川爾幽獨可憐今夜宿青山何年却向青山
宿山花漸暗月漸明月照空山滿山綠山空月午夜無

人何處知我顏如玉

山枇杷

山枇杷花似牡丹殷

烏間切

潑血往年乘傳過青山正值

山花好時節壓枝凝艷已全開映葉香苞纔半裂緊搏

紅袖欲支頤慢解

賀買切

絳囊初破結金線叢飄繁藥亂

珊瑚朶重纖莖折因風旋落裙片飛帶日斜看目精熱

亞水依巖半傾側籠雲隱霧多愁絕綠珠語盡身欲投

漢武眼穿神漸滅穠姿秀色人皆愛怨媚羞容我偏別

說向閒人人不聽曾向樂天時一說昨來谷口先相問
及到山前已消歇左降通州十日遲又與幽花一年別
山枇杷爾託深山何太拙天高萬里看不精帝在九重
聲不徹園中杏樹良人醉陌上柳枝年少折因爾幽芳
喻昔賢磻溪冷坐權門咽

樹上烏

癸卯

樹上烏洲中有樹巢若鋪百巢一樹知幾烏一鳥不下
三四雛雛又生雛知幾雛老烏未死雛已鳥散向人間

何處無攫麕啄卵方可食男女羣強最多力靈蛇萬古
唯一珠豈可抨彈千萬億吾不會天教爾輩多子孫告
訴天公天不言

琵琶歌

寄管兒兼誨鐵山。
此後並新題樂府

琵琶宮調八十一旋宮三調彈不出玄宗偏許賀懷智
段師此藝還相匹自後流傳指撥衰崑崙善才徒爾為
湏聲少得似雷吼聲去纏絃不敢彈羊皮人間奇事會相
續但有卞和無有玉段師弟子數十人李家管兒稱上

足管兒不作供奉兒拋在東都雙鬢絲逢人便請送杯
盞著盡功夫人不知李家兄弟皆愛酒我是酒徒為密
友著作曾邀連夜宿中碾春溪華新綠平明船載管兒
行盡日聽彈無限曲曲名無限知者鮮霓裳羽衣偏宛
轉涼州大遍最豪嘈六么散序多籠撚我聞此曲深賞
奇賞著奇處驚管兒管兒為我雙淚垂自彈此曲長自
悲淚垂捍撥朱絃濕冰泉鳴咽流鶯澁因茲彈作雨霖
鈴風雨蕭條鬼神泣一彈既罷又一彈珠幢夜靜風珊

珊低徊慢弄關山思坐對燕然秋月寒月寒一聲深殿
磬驟彈曲破音繁併百萬金鈴旋去聲玉盤醉客滿船皆
暫醒自茲聽後六七年管兒在洛我朝天游想慈恩杏
園裏夢寐仁風花樹前去年御史留東臺公私感促顏
不開今春制獄正撩亂晝夜推囚心似灰暫輟歸時尋
著作著作南園花拆萼臘脂耀眼桃正紅雪片滿溪梅
已落是夕青春值三五花枝向月雲含吐著作作施蹲命
管兒管兒久別今方覩管兒還為彈六么六么依舊聲

迢迢猿鳴雪岫來三峽鶴唳晴空聞九霄逡巡彈得六

么徹霜刀破竹無殘節幽關鷓鴣軋胡雁悲斷絃砮霍虢切皮

骨相砮音若又音離聲馬殍同上解層冰裂我為含淒歎奇絕許作長歌

始終說藝奇思寡塵事多許來寒暑又經過音如今左

降在閒處始為管兒歌此歌歌此歌寄管兒管兒

憂爾衰爾衰之後繼者誰繼之無乃在鐵山鐵山已近

曹穆間二善才姓性靈甚好功猶淺急處未得臻幽閒努力

鐵山勤學取莫遣後來無所祖

小胡笳引

桂府王推官出蜀匠雷氏金徽琴請姜宣彈

雷氏金徽琴王君寶重輕千金三峽流中將得來明窓
拂席幽匣開朱絃宛轉盤鳳足驟擊數聲風雨迴哀笳
慢指董家本姜生得之妙思忖泛徽胡雁咽蕭蕭繞指
輓轡圓袞袞吞恨絨情乍輕激故國關山心歷歷潺湲
疑是雁鵑鵲音闌提砧騶如聞發鳴鏑流宮變徵漸幽咽
別鶴欲飛猿欲絕秋霜滿樹葉辭風寒雛墜地烏啼血
哀絃已罷春恨長恨長何恨懷我鄉我鄉安在長城窟

聞君虜奏心飄忽何時窄袖短貂裘
臙脂山下彎明月

去杭州 送王師範

房杜王魏之子孫雖及百代為清門
駿骨鳳毛真可貴

崗頭澤底何足論

近世不以勲賢之胄為令族而以崗盧澤李為甲門

去年江上

識君面愛君風貌情已敦與君言語見君性
靈府坦蕩

消塵煩自茲心洽跡亦洽居常並榻游並軒
柳陰覆岸

鄭監水李花壓樹韋公園每出新詩共聯綴
閒因醉舞

相牽援時尋沙尾楓林夕夜摘蘭叢衣露繁
今君別我

欲何去自言遠結迢迢婚簡書五府已再至波濤萬里
酬一言為君再拜贈君語願君靜聽君勿喧君名師範
欲何範君之烈祖遺範存永寧昔在掄鑒表沙汰沉濁
澄浚源君今取友由取士得不別白清與渾昔公事上
盡忠讜雖及死諫誓不諛今君佐藩如佐主得不陳露
訓所思昔公為善日不足假寐待旦朝至尊今君三十
朝未與得不寸晷倍璵璠昔公令子尚貴主公執舅禮
婦執笄返拜之儀自此絕關雎之化皎不昏君今遠甥

奉明記得不齊勵親蘋蘩斯言皆為書佩帶然後別袂
乃可捫別袂可捫不可解解袂開帆悽別魂魂搖江樹
鳥飛沒帆挂檣竿鳥尾翻翻風駕浪拍何處直指杭州
由上元上元蕭寺基址在杭州潮水霜雪屯潮戶迎潮
擊潮鼓潮平潮退有潮痕得得為題羅剎石古來非獨
伍員冤

南家桃

南家桃樹深紅色日照露光看不得樹小花狂風易吹

一夜風吹滿牆北離人自有經時別眼前落花心歎息
更待明年花滿枝一年迢遞空相憶

志堅師

嵩山老僧披破衲七十八年三十臘靈武朝天遼海征
宇宙曾行三四匝初因怏怏剃却頭便繞嵩山寂師塔
淮西未返半年前已見淮西陣雲合

答子蒙

報盧君門外雪紛紛紛紛門外雪城中鼓聲絕強梁御

史人覲步安得夜開沽酒戶

辛夷花

問韓員外

問君辛夷花君言已斑駁不畏辛夷不爛開顧我筋骸
官束縛縛遣推囚名御史狼籍囚徒滿田地明日不推
緣國忌依前不得花前醉韓員外家好辛夷開時乞取
三兩枝折枝為贈君莫惜縱君不折風亦吹

廳前栢

廳前栢知君曾對羅希奭我本癡狂耽酒人何事與君

為對敵為對敵洛陽城中花赤白花赤白因漸多花之
赤白柰爾何

夜別筵

夜長酒闌燈花長燈花落地復落床似我別淚三四行
滴君滿坐之衣裳與君別後淚痕在年年著衣心莫改

三泉驛

三泉驛內逢上巳新葉趨塵花落地勸君滿盞君莫辭
別後無人共君醉洛陽城中無限人貴人自貴貧自貧

何滿子歌

張湖南座為
唐有熊作

何滿能歌能宛轉天寶年中世稱罕
嬰刑繫在圜圜間
下調哀音歌憤懣
黎園弟子奏玄宗
一唱承恩羈網緩
便將何滿為曲名
御譜親題樂府纂
魚家入內本領絕
葉氏有年聲氣短
自外徒煩記得詞
點拍纔成已夸誕
我來湖外拜君侯
正值灰飛仲春瑄
廣宴江亭為我開
紅粧逼坐花枝暖
此時有熊蹋華筵
未吐芳詞貌夷坦
翠蛾轉盼搖雀釵
碧袖歌垂翻鶴卵
定面凝眸一聲發

雲停塵下何勞筭迢迢擊磬遠玲玲一一貫珠勻款款
犯羽含商移調態留情度意拋絃管湘妃寶瑟水上來
秦女玉簫空外滿纏綿疊破最慙慙整頓衣裳頗閒散
冰含遠溜咽還通鶯泥去聲晚花啼漸嬾斂黛吞聲若自
冤鄭袖見捐西子浣陰山鳴雁曉斷行巫峽哀猿夜呼
伴古者諸侯饗外賓鹿鳴三奏陳圭瓚何如有熊一曲
終牙籌記令紅螺盃

通州丁溪館夜別李景信三首

月蒙蒙兮山掩掩束束別魂眉斂斂蠡琰阻限切覆時天

欲明碧幌青燈風濫濫以陝切淚消語盡還暫眠唯夢千

山萬山險

水環環兮山簇簇啼鳥聲聲婦人哭離牀別臉睡還開

燈炮似也切暗飄珠簌簌山深虎橫館無門夜集巴兒扣

空木

雨瀟瀟兮鵲咽咽傾冠倒枕燈臨滅倦僮呼喚磨於京切

復眠啼雞拍翅三聲絕握手相看其奈何奈何其奈天

明別

酬鄭從事四年九月宴望海亭次用舊韻

海亭樹木何籠葱寒光透圻秋玲瓏湖山四面爭氣色

曠望不與人間同一拳墦伏東武小

龜山別名

兩山鬬構秦

望雄

兩峯為秦望
望秦二山

嵌空古墓失文種

墓在州城西山
上圖經湖水到山迎

棺柩入海今
所存古穴耳

突兀怪石疑防風舟船駢比有宗侶水雲

滃泱無始終雪花布遍稻隴白日脚挿入秋波紅興餘

望劇酒四坐歌聲舞豔烟霞中酒酣從事歌送我歌云

此樂難再逢良時年少猶健羨使君況是頭白翁我聞
此曲深歎息唧唧不異秋草蟲憶年十五學構厦有意
蓋覆天下窮安知四十虛富貴朱紫束縛心志空粧梳
妓女上樓榭止欲歡樂微茫躬雖無趣尚慕賢聖幸有
心目知西東欲將滑甘柔藏府已被鬱噎衝喉嚨君今
勸我酒太醉醉語不復能沖融勸君莫學虛富貴不是

賢人難變通

一本富貴不
是賢人通

元氏長慶集卷三十六

欽定四庫全書

元氏長慶集卷二十七

唐 元稹 撰

賦

奉制試樂為御賦

以和樂行道之本為韻依次用

臣伏奉庚寅之詔曰天子以樂為御其義則那臣以為
引重任者無御不可播盛德者非樂而何蟠乎地而際
乎天周流既超於馬力發乎邇而應乎遠馳聲亦倍於

鑾和喻之為至此實居多大道既移則舞行象成於周
載小戎或駕則琴音決勝於騶歌故聖王取彼驩然宣
諸沃若制其節奏戒乎行作聽祈招之什冀絕跡於奔
車賦盤遊之詞俾慮危於朽索是以南薰馳而虞德盛
北里騁而殷道惡控海內當並驚於勛華執人柄豈爭
功於良樂斯御也動無險阻發自和平周旋罔害歡愛
則行止之而優游靈府推之而浹洽寰瀛非勞輶輶但
布莖英陋乎足跡運以精誠爾或馳驅難期於無災無

害我之步驟乃在於大鳴小鳴故曰得禽而詭遇不如
率獸以仁聲且跋涉者疲於山川條暢者格乎穹昊慕
入律而百蠻磨至錫有功而諸侯軌道豈出戶庭非專
擊考乘六氣之辨哂六轡之徒施鼓八風而行知八駿
之非寶於是屏造父命后夔或無聲而至矣或先進以
道之豈獨周域中而利其銜策亦將肥天下而淪乎髓
肌若此則宇宙蓋由乎一馬牽制盡在於四維雖質文
更變而公共操持莫不得之者昌失之者損俗化清而

鞭朴廢和順積而車書混故臣稹前此而言曰引重任者御為之先播盛德者樂為之本伏惟皇帝陛下推是心而居其與臣徒欲貢所聞而安敢窺其間

善歌如貫珠賦

以聲氣圓直有如貫珠為韻依次用

珠以編次歌有繼聲美綿綿而不絕狀纍纍以相成偏佳朗暢屢比圓明度彫梁而暗繞誤風綴之頻驚響象而然非謂結之以繩約氣至則爾故可貫之以精誠原夫以節為珠以聲為緯漸杳杳而無極以多多而益貴

悠揚綠水訝合浦之同歸繚繞青霄環五星之一氣望
明月而宛轉感潛蛟之歔歔若非象照乘之珍安能忘
在齊之味其始也長言邐迤度曲纏綿吟斷章而離離
若間引妙囀而一一皆圓小大雖倫離朱視之而不見
唱和相續師乙美之而謂連當其拂樹彌長凌風乍直
意出彈者與高音而臻極及夫屬思漸繁因聲屢有想
無脛者隨促節而奔走以洞徹為精英比疵瑕於能否
次第其韻且殷勤於士衡之文上下其音謂低昂於游

女之手窈窕遠矣徘徊繹如髣髴成象玲瓏構虛頻寄
詞於章句之末願連光於咳唾之餘清而且圓直而不
散方同累丸之重疊豈比噴泉之撩亂懼無知者初憫
默於暗投善則返之乃因循於舊貫美清冷而發越憶
輝光之璀璨始終雖異細大靡殊中規矩於圓折成條
貫以縈紆似是而非賦湛露則方驚綴冕有聲無實歌
芳樹而空想垂珠美惡難掩前後不踰亦比掄材而至
者豈獨善歌之謂乎

鎮圭賦

以王者端拱四維
鎮寧為韻依次用

天子之鎮圭十有二寸其長義在撫十有二州之域而
為億兆之王圭比德焉所以美特達之美鎮大名也有
以示彈壓之強以之徵守則有土之臣至以之恤患則
受災之地康當宁乃無為於南面朝日乃有事於東方
會百辟而執之班五瑞於來者作山龍之端表我則清
光皎然雜蒲穀以成行爾則鞠躬如也想夫彤闥乍曉
碧砌生寒當玉座而高居狀中峯之冠瑤岫透爐烟而

迴出意秋月之壓雲端是以聖后矜持庶寮瞻重安八
荒於度內故捧必當心握萬務於掌中故大不盈拱映
冕旒則璿樞星綴間黼黻而瓊枝花擁豈獨使威儀可
觀亦以明社稷有奉美哉聖人之制器也靡不有類銳
上以象天方下而法地備采章以盡飾璩崇高而定位
夫衆色不可以雜施依方面之正者惟五羣山不可以
咸寫選域中之大者有四盡舉凡而得一故相傳而莫
二義存敬慎道在底綏詳觀組約足辨操持俾經制之

不亂若縹藉之相維况國家備物繼周垂衣體舜自天
有命非因桐葉而封唐提象握機故配土行而執鎮豈
惟傳歷代之瑞寶抑亦彰受命之符信者也重曰圭銳
也睿作思而百志靈鎮安也安於道而萬物寧亦嘗三
復斯名矣所以表道德之維馨若此則君為道之本器
乃道之形苟能據於道而依於德亦可以執無名之璞
而逍遙乎大庭

觀兵部馬射賦

以藝成而動舉
必有功為韻

大司馬以馳射而選才衆君子皆注目而觀藝至張侯之所乃執弓而誓誓曰今皇帝製羽舞以敷文德擇材官而奮武衛兼以超乘者為雄不惟中鵠者得祭用先才捷志亦和平以多馬為能故以馬為試以得祿為美故以鹿為正豈獨武人之利實唯君子之爭射者皆曰諾雖五善之末習庶一舉而有成於是馬逸駢駢士勇伾伾蓄銳氣候歌詩初聽采蘋之章共調白羽次逞穿楊之妙忽縱青絲旁瞻突過咸懼發遲曾驥足之展矣

翻猿臂而射之揮弓電掣激矢風追方當耦象決裂麗
龜砮爾摧班示偏工於小者安然飛鞚故無憂於殆而
信候蹄之不爽則舍拔之無遺故司射舉旌以効勝曰
爾能克備我爵可期賈餘勇者宜乘破竹之勢善量力
者當引負薪之辭由是靡不爭先莫肯為後皆曰措枉
於肘十得其九忝明試者亦何嘗而不有破的之術萬
不失一凡獻藝者豈自疑於無必衝冠髮怒揚鞭氣逸
引滿雷碎騰凌颺疾皆窮百中之妙盡由一札而出乃

知來者之藝蓋亦前人之匹若此則蹲甲壯基揚解觀
孔信一場之獨擅終六轡之未總豈比乎浮雲迴度開
月影而彎環驟雨橫飛挾星精而搖動雖當至理不忘
庸功天子垂衣儼鵷行於北闕夏官司馬閱騎從於南
宮貢士之程職司其舉會款塞五方之俗觀校埒百夫
之禦得雋為雄唯能是與星郎草奏上獻拱辰之防天
驕解顏喜見射鵰之侶客獨顧之而笑曰此蓋有司之
拔萃固非吾君之右汝我有筆陣與詞鋒可以偃干戈

而息戎旅司文者聞之而驚曰爾其自礪於爾躬吾將
獻爾於王所

郊天日五色祥雲賦


以題并賦
字為韻

臣奉某日詔書曰惟元祀月正之三日將有事於南郊
直端門而未出天錫予以雲瑞是何祥而何吉臣拜稽
首敢言其實陛下乘五位而出震迎五帝以郊天五方
騰其粹氣故雲五色以相宣控壇乍直捧日初圓獸蹲
而龍鱗熠熠鳥跂而鳳翼翩翩羽蓋凝而軒皇暫駐風

馬駕而王母欲前影帶旂常疑錯繡之遙動昭章文物
皆摛錦之相連觀之者無小無大謂之曰若烟非烟昔
者卿雲作歌於虞舜白雲著詞於漢武皆跂望而為言
非仰觀而遂覩今陛下德至天地恩覃草莽當翠輦黃
屋之方行見金枝玉葉之可數陋泰山之觸石方出鄙
高唐之舉袂如舞昭布於公侯卿士莫不稱萬歲者三
並美于麟鳳龜龍可以與四靈而為五於是載筆氏書
百辟之詞曰郁郁紛紛慶霄之雲古有堯舜幸得以為

君象胥氏譯四夷之歌曰煒煒煌煌天子之祥唐有神
聖莫敢不來王帝用愀然曰予何力澤未周於四海雲
胡為而五色來爾羣后舉爾衆職因五行以修五事由
五常以厚五德正五刑以去五虐繁五稼以除五賊苟
順夫人理之父子君臣安知夫雲物之赤黃蒼黑進我
輦路就我陶匏雖有光華之萬狀不若豐穰於四郊凡
百庶寮相趨而顧稍疑江上之綺果異封中之素補天
者雖欲抑之而不出吞筆者安可寢之而無賦越明日

臣稹詠霈澤於雞竿之前佇斯雲散之為五采之湛露



元氏長慶集卷二十七